

In memorie dal professôr Marzi Strassolt

DANIELE LIVON

Ricuardâ il prof. Marzi Strassolt par me al vûl di fâ riferiment a moments une vore impuartants de mê vite personâl e professionâl. E al è cussì che o vuei ricuardâlu.

O ai cognossût il prof. Marzi Strassolt te Vierte dal 1998, cuant che, come student che al stave par laureâsi te facoltât di Economie e Cumierç de Universitât dal Friûl, mi presentai par domandâi la disponibilitât di seguîmi te tesi di laurea. Chel incuintri, intun cjalt dopomisdì, te sede di vie Trep dal Dipartiment di Siencis statisticis, no lu dismentearai mai. A son ciertis personis che o incuintrìn che a segnìn il percors de nestre vite. Chest al è stât par me il prof. Marzi Strassolt e il rapuart che si è creât tra di nô. La prime domande che mi fasè e fo: “Livon. Di dulà vegnial? Fevelial furlan?”. Sul moment o restai di clap cence savê pardabon ce e in ce lenghe rispuindi. Daspò sclaridis lis mê origjins furlanis e confermât che o fevelavi furlan, o tacarìn a discuti de mê tesi. Di chel moment, in ducj i incuintris cul prof. Strassolt o vin simpri fevelât te nestre marilenghe. O pensi dispès a chest aspjet e al so leam cu la identitât dal Friûl e cun dut chel che al podeve valorizâ cheste identitât, soledut il rapuart cu lis personis. No ai mai rivât, tai agns daspò, a fevelâ cun lui intune lenghe diferente dal furlan.

Di chel incuintri mi maraveà ançe altri. In chês volte il prof. Strassolt al jere Retôr de Universitât dal Friûl, come che a lui i plaseve specificâ, e jo mi spietavi di cjatâ un professôr che, plen di impegnis istituzionâi, nol varès vût ni le voie ni il timp di dedicâsi a un student in vore cu la sô tesi di laurea. O incuintraï impen une persone une vore disponibile e plene di rispiet pal lavôr di ducj. Si interessà dal gno percors, mi domandà ce

che o varès vût gust di fâ e mi proponè une schirie di arguments par definî il titul de mê tesi.

In ogni incuintri e vignive fûr la sô atenzion pal interlocutôr, la sô disponibilîtât tal scoltâ e, cuant che al jere pussibil, tal risolti subit il probleme che al vignive puartât ae sô atenzion. Carateristichis che a jerin un trat distintîf de sô personalitât e che o ai simpri preseât, ancje cuant che, tai agns dopo, o ai vût il privileç di lavorâ te Universitât dal Friûl, cun lui come Retôr.

Vie pai mê, intant che o lavoravi ae mê tesi, a son stâts altris moments che a descrivin ben la personalitât dal om e il caratar di condotîr.

Mi visi, di fat, i incuintris te sede di vie Tomadini de facoltât di Economie, o tal so ufici in vie Trep o diretementi in Retorât a Palaç Florio. Incuintris che a podevin jessi fissâts a cualsisedi ore e che, intun mût o chel altri, lui al rivave simpri a rispjetâ e che a jerin occasions di dulà che al vignive fûr simpri cualchi richieste, cualchi sugjeriment o cualchi consei par miorâ il lavôr. O lavoravi suntun argument che lui al veve cetant a cûr e che, intun ciert sens, e je stade la fortune dal gno percors professionâl. Al jere interessât a analizâ la distribuzion dai docents tal sisteme universitari nazionâl, tra lis Universitâts statâls, tra lis facoltâts e daûr dai students iscrits; un mût par dimostrâ, ancje partint dal model di finanziament statâl aes Universitâts in vore in chê volte, cemût che la distribuzion des risorsis e patîs i efîets di une distribuzion inicue dai docents tra lis Universitâts. Probabilmentri al jere un dai tancj lavôrs che, su la fonde de analisi dai dâts, a infuativin la sô posizion di denunzie dal sotfinanziament che in chei agns e pative la Universitât dal Friûl, intun periodi di disvilup de ufierte formative e espansion teritoriâl dal ateneu che lui al veve volût a fuart.

O scuén dî graciis al prof. Strassolt par dut ce che mi è sucedût ancje dopo.

Pôcs mê dopo de lauree (tal mê di Març dal 1999), di fat, o scomençai a lavorâ pe Universitât e al fo propit lui a dâmi la pussibilitât di colaborâ cui uficis de amministrazion che mi permeterin di jentrâ in maniere operative tai mecanisims di funzionament dal ateneu. Une esperience formative e professionâl impuartantone pal gno percors intai agns dopo.

Ancje in chê ocasion si è dimostrât persone gjenerose, che mi à dade

fiducie. Mi tornin iniment lis sentadis dai Senâts academics cuant che mi invidave a partecipâ ogni volte che si fevelave di assegnazions des risorsis a lis struturis dal ateneu (Facoltâts, Dipartiments); il pinsîr al va ae sô maniere di contabilizâ la atribuzion e l'ûs des facoltâts assunzionâls che, cence jentrâ tai detais, al diventà, cetancj agns dopo, il stes sisteme doprât a nivel nazionâl dai Ministeris de Economie e des Financis e di chel de Universitât e de Ricercje. Ancje in chest al fo un precursor dai tîmps e lavorâ cun lui e fo une esperience uniche.

Tra i tancj episodis che mi visi al è chel dal prin incuintri cun chel che al sarès stât il so sucessôr e, par diviers aspiets, une persone ancjetant impuartante pal gno percors professionâl, o ben il prof. Furio Honsell. A jerin i prins dîs dal 2001, il prof. Honsell al jere Proretôr dal prof. Strassolt, e al fo propit Strassolt a presentânus. Intune frede matine di Zenâr, un incuintri tal curtîl di Palaç Florio, lì che i disè al prof. Honsell di stâmi daûr tal lavôr che o stavi puartant indevant in chel periodi. Intal stes an, pôcs mêis dopo, al fo propit il prof. Honsell a diventâ Retôr de Universitât dal Friûl e ancje cun lui o podei lavorâ tai agns daspò.

Ancje dopo de fin dal mandât di Retôr dal prof. Strassolt e il so passaç a President de Provincie di Udin, il nestri rapuart al restà chel di simpri e, cun grande ricognossince, stime e afiet, i nestris contats a son continuâts ancje tai agns a vignî.

Cumò, diviers agns dopo dal nestri prin incuintri, mi cjati a lavorâ a nivel ministeriâl, propit su chei che a jerin i arguments de mê tesi di laurea, e propit ta chei uficis che il prof. Strassolt al frecuentave cuant che al partecipave aes riunions de Conference dai Retôrs e, ae fin di ogni riunion, al veve la abitudine di telefonâ subit ai uficis de Universitât e comunicâ lis ultimis novitâts o lis necessitâts pluî urgentis par jessi simpri pronti a frontâ lis richiestis ministeriâls. O pensi che dut chest al sedi ancje par merit so e mi fâs cetant palsê che chê sô intuizion dal prin moment e vedi vût i siei risultâts; o sai che al jere braurôs di chest, cussì come jo, vuê, i ai cetant agrât. Mi à compagnât il so esempi, il sens dal lavôr, de responsabilitât e des Istituzions. O sieri chest gno ricuart cussient de fortune che o ai vude a cognossilu e cu la sperance di jessi simpri ae altece di ce che lui si spietave di me.

Mandi, Professôr.